

Nuna tamakkerlugu illuutiniq ilusilersuisarnermut, illuliortaatsinut, politikimik ineriartortitsinissamut suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. (Inatsisartunut ilaasortaq Erik Jensen, Siumut)

Akissuteqaat

(Ineqarnermut, Attaveqaasersuutitut Isorliunerusunullu Naalakkersuisoq)

Siullermeerneqarnera

Nuna tamakkerlugu illuutiniq ilusilersuisarnermut, illuliortaatsinut, politikimik ineriartortitsinissamut suliaqaqqullugit Naalakkersuisut peqquneqarnissaannik Inatsisartunut ilaasortaq, Erik Jensen-ip, siunnersuuteqarneranut Naalakkersuisut sinnerlugit qutsavigaara.

Illuliortaaseq illuutitut tunngassuteqaannarani aammali kinaassutsimut, kulturimut, inuunerissaarnermut, inuiaqatigiinnilu ineriartortitsinermut tunngassuteqarneranik siunnersuuteqartup isumaanut Naalakkersuisunit isumaqatigaarput. Sanaartukkat ulluinnatsinnut sinaakkutissiipput, inuiaqatigiinnilu qanoq ineriartornissatsinnut aalajangiisuullutik. Tamanna pillugu siunissami nuna tamakkerlugu – illoqarfinni, nunaqarfinnilu – sanaartugassanut, illoqarfinnik ineriartortitsinissamut, kinaassutsimullu takussaasumut ataatsimut takorluukkap allaaserineqarnissaanut, nuna tamakkerlugu illuutiniq ilusilersuisarnermut, illuliortaatsimut, politikki sakkussaasinnaavoq pingaarutilik.

Naalakkersuisut siornatigut erseqqissaatigeriigaattut suliassaq periusissiorfiusumik, siunissamullu ungasinnerusumut aqqissuunneqartariaqarpoq. Imaappoq, periusissiorfiusumik pilersaarusiornissaq siullertut suliassaasariaqarpoq, tassanilu tunniussivissat ersaritsillugit suliassat agguataarneqassallutik, soorluttaaq ingerlatsisut attuumassutillit, inuiaqatigiillu siammasissumik oqaloqatigineqassasut. Takorluukkatsinnik qanoq piviusunngortitsiartuaarsinnaanissatsinnut, pilersaarut taamak ittoq piviusorsiorpalaartunik sinaakkutissiissaaq, soorluttaaq nukiit siunnerfilimmik atorineqassasut.

Nuna tamakkerlugu illuutiniq ilusilersuisarnermut, illuliortaatsinut, politikissaq ilaatigut tulluittut aallaaveqarsinnaassasoq Naalakkersuisunit pingaartippa:

- Illuliortaatsini ataatsimoorussamik aallaaveqarneq: Nuna tamakkerlugu politikki aallaaveqartariaqarpoq oqaluttuarisaanerup ilisimaarineranik, ataqqinnittumillu nunatsinni ineriartorneq ilitsoqqussallu aallaavigalugit. Pigeriikkatta

illersorneqarnissaat, atugassarititattalu siunissami qanoq ilusilersorneqarnissaannik kissaatitta nassuiarneqarnissaat pineqarpoq.

- Kalaallit Nunaanni illuliortaaseq, kulturikkullu kingornussat: Kulturikkut kingornussat pigiinnarneqarnissaannut, nutarterneqarnissaannullu kiisalu nunaqarfitsinni, illoqarfitsinnilu kinaassutsit nukittorsarneqarnissaanut Illuutiniq ilusilersuisarnermut, illuliortaatsinut, politikkipissaq tunngavissiisariaqarpoq. Tamanna innuttaasunut ulluinnarni tunngavissiinerullunilu tulluusimaartitsinerussaaq.
- Piujuartitsineq, silallu pissusaanut naleqqussaaneq: Silap pissusaata allanngoriartorneratigut Kalaallit Nunaat immikkut illuinnartunik unamminartitassaqarpoq. Taamaattumik avatangiisit eqqarsaatigalugit sanaartornissami aaqqiissutissat, siunissamilu piumasaqaataasussanut akiuussinnaallutik sannaat qajannaatsut illuutiniq ilusilersuisarnermut, illuliortaatsinut, politikkipissap tunngavissittariaqarpai.
- Inuunerup pitsaassusaa, atukkatigullu sinaakkutit: Illoqarfiit aamma illut kusanartut, siunertarisamut naleqquttut, akuutitsisullu aqqutigalugit illuliortaaseq ataatsimoornissamut, atugarissaarnissamut, peqqissutsimullu tunngavissiisinnaavoq.
- Illoqarfiit, nunaqarfiillu: Sumiiffiit ataasiakkaat immikkoorutaat ataqqillugit ineriartortitsisoqartariaqarpoq, najukkamilu nutaaliornissaq, aningaasanik kaaviiaartitsinissaq, suliffissallu nutaat pilersinneqarnissaannut inissaqartitsisoqartariaqarluni.
- Illuliortaaseq aningaasatigut kivissutissatut: Illuliortaaseq nutaaliornissamut, aningaasaliinissamut, takornarialerinissamullu ingerlatsisutut ingerlasinnaavoq. Tamanna inuussutissarsiutilinnut, inuiaqatigiillu aningaasaqarnerinut nukittorsaataasinnaavoq.

Taassuma saniatigut suliamut atatillugu illuliortiternermik, sanaartornermillu suliaqarfimmi isumaqatigiissusiortarnermi tunngaviit, malittarisassallu atuuttut politikkipimi isiginiarneqarnissaat Naalakkersuisunit qulakkiissavarput. Malittarisassat, suliaassallu nassuiaataat ullutsinnut naleqquttunngorumallugit, Kalaallit Nunaannilu pissutsinnut aamma anguniakkanut, taakkununga ilanngullugit pilersaarusiornissamut, suliniuteqarnissamut, neqeroortitsinissamut, sanaartugassallu sanaartorneqarnissaannut sinaakkutit tunngavissiisut naleqqussarumallugit suliaq taanna aallartinneqareerpoq.

Nuna tamakkerlugu illuutiniq ilusilersuisarnermut, illuliortaatsinut, politikkipiornissami aningaasatigut aallaavissaq aamma aalajangiisuuvuq. Aningaasatigut ilungersunartumik inissisimagatta Naalakkersuisunit erseqqissaatigisariaqarparput, tamanna pillugu annertuumik sipaaruteqarnissaq, pisortallu aningaasartuutaasa sukannersumik aqunneqarnissaannut 2026-mut Aningaasanut inatsisissatut siunnersuummi anguniarneqarluni.

Tamanna pillugu aningaasatigut, allaffissornikkullu kingunerisinnaasaanik ersarissumik naliliinissami tunngavissiiinnaalluni periusissiorfiusumik pilersaarusiornissap siullertut ukkatarineqarnissaa aalajangiisuvoq. Taassuma kingorna suliap ingerlateqqinneqarnissaa Inatsisartut suleqatigalugit ataavartumik qulaajarneqartariaqarpoq, aningaasatigullu tamakkiisumik pingaarnersiuinermut, aningaasalersuisinnaanermullu periarfissanut naleqqussarneqarluni.

Pitsaassutsimut, piujuartitsinissamut, sanaartukkallu ataqatigiinnerinut nuna tamakkerlugu illuutiniq ilusilersuisarnermut, illuliortaatsinut, politikkissaq tapertaasinnaammat Naalakkersuisunit isumaqatigaarput. Tamanna pillugu Naalakkersuisunit inassutigaarput siunnersuut akuersissutigineqassasoq, suliaasarlu periusissiorfiusumik pilersaarusiornermik aallartinneqassasoq.

Taamatut oqaaseqarlunga oqallilluarnissamut qilanaarpunga.